



## "PERJUANGAN MEMARTABATKAN ISLAM"

الْحَمْدُ لِلَّهِ الْقَائِلُ: الْيَوْمَ أَكْمَلْتُ لَكُمْ دِينَكُمْ وَأَتِمَمْتُ  
عَلَيْكُمْ نِعَمَتِي وَرَضِيتُ لَكُمُ الْإِسْلَامَ دِينًا.  
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ  
أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى  
سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.  
أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، قَالَ اللَّهُ  
تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ  
إِلَّا وَأَنْتُمْ مُسْلِمُونَ.

**Sidang Jumaat Yang Dirahmati Allah,**

Marilah kita bertaqwa kepada Allah SWT, dengan melaksanakan segala perintah-Nya dan menjauhi segala larangan-Nya. Sesungguhnya orang yang paling mulia di sisi Allah SWT ialah orang yang paling bertaqwa.



Sesungguhnya Islam merupakan satu cara hidup yang lengkap. Oleh itu disamping ibadat khusus, Islam juga mengajak umatnya berjuang, berjihad, menyeru kepada kebaikan dan kebenaran, menentang kemungkaran dan memberi nasihat yang berterusan samada ianya untuk orang awam, ulama' atau umara'.

### **Sidang Jumaat Yang di Rahmati Allah,**

Sesuatunya generasi dikatakan merdeka apabila dapat memiliki pemikiran, minda dan misi yang tidak terikat dengan penjajah. Oleh yang demikian, masyarakat yang merdeka sudah pasti mempunyai kehebatan, kebijaksanaan dan kemampuan untuk mentadbir dan melaksanakan aktiviti kehidupan berdasarkan panduan Ilahi, demi untuk mendapat keredhaan Allah SWT. Hal ini amat penting difahami kerana merdeka bererti bebas daripada sebarang cengkaman mental, fizikal dan spiritual tetapi tetap mematuhi panduan syarak.

Para penjajah telah melakukan cara licik yang amat berkesan; antaranya melalui penggunaan bahasa sebagai alat untuk merosakkan pemikiran, pemahaman dan keyakinan umat Islam. Melalui bahasa sama ada; Belanda, Inggeris, Perancis dan lain-lain, mereka boleh mempropagandakan pendapat, pandangan dan huraian. Melalui penguasaan bahasa akan wujud pula jaringan menerusi percakapan, persuratan, penulisan dan media massa.

Sesungguhnya penjajah melakukan tiga tujuan dalam satu tindakan iaitu; **Pertama** menjajah, **kedua** mendakyah agama lain dan **ketiga** meruntuhkan kekuatan Islam. Meskipun matlamat pengkristianan tidak dapat dicapai sepenuhnya, namun melalui usaha gigih dan terancang, mereka telah berjaya menggoncang, mengeliru, menyeleweng sikap dan pemikiran segolongan besar umat Islam.



Kejayaan sebegini sudah memadai jika sebahagian besar daripada umat Islam telah terpesong dan tersasar daripada aqidah Islam, menandakan mereka telah berjaya melemahkan pegangan, keimanan, dan aqidah umat Islam.

Rencana jahat mereka juga telah berjaya menjadikan segolongan Muslim terpisah daripada akar budaya Islam kerana telah terpedaya dan terpesona dengan kejayaan lahiriah penjajah yang dicanang melalui mata pelajaran sejarah keagungan Eropah.

Pelbagai unsur peradaban Barat atau imperialis ditanam di kalangan masyarakat Islam kerana merekalah yang diharap akan dapat mempengaruhi seluruh lapisan bangsanya supaya mengagungkan penjajah. Melalui tindakan, sikap dan pemikiran mereka akan mempengaruhi tanggapan umat Islam.

Malahan mereka bersekongkol pula dengan kumpulan lain yang turut membenci Islam iaitu kelompok **sekularis, pluralis dan sosialis**. Turut membantu mereka ialah media massa; sama ada media elektronik atau media cetak yang menyiarkan berita atau maklumat yang telah diolah untuk mengelirukan umat Islam. Ditambah pula dengan pelbagai rancangan berbentuk filem, dokumentari dan diskusi yang sering tersasar daripada nilai syarak yang dirancang penyiarannya untuk merosakkan aqidah umat Islam. Keadaan menjadi semakin meruncing apabila adegan ganas, tahyul dan seks bebas disiarkan secara berleluasa yang pasti akan merosakkan aqidah dan melemahkan amal sehingga merangsang berlakunya gejala sosial.

Namun generasi Islam kini tiada mempunyai pilihan, melainkan bertindak membebaskan umat Islam daripada pelbagai belenggu yang merantai kebebasannya untuk melaksana dan mengamalkan Islam secara syumul dan menyeluruh. Oleh itu, kesemua halangan atau unsur yang disebutkan hendaklah dihindarkan daripada umat Islam. Kita perlu menyelamatkan aqidah dan iman



umat Islam kerana tidak ada yang lebih mahal harganya bagi seorang Muslim, selain daripada dapat mempertahankan aqidah dan iman. Malahan tuntutan yang lebih jauh ialah kita perlu menjelmakan penghayatannya dalam bentuk kehidupan; individu, keluarga, masyarakat mahupun negara.

Semua pihak tanpa mengira pebezaan fahaman politik atau pendidikan, selagi beragama Islam; hendaklah bersatu-padu dan bersama membangunkan kesyumulan Islam supaya kembali berada di persada kegemilangannya. Hindarkanlah persengketaan yang disebabkan oleh perkara yang remeh, sedangkan musuh-musuh Islam sentiasa mencari peluang untuk melemah dan menghancurkan umat Islam. Carilah titik persepakatan yang boleh dimanfaatkan untuk kemajuan Islam.

Firman Allah SWT dalam surah Al-Hujurat ayat 15;

إِنَّمَا الْمُؤْمِنُونَ الَّذِينَ ءَامَنُوا بِاللّٰهِ وَرَسُولِهِ ثُمَّ لَمْ  
يَرْتَابُوا وَجَاهَدُوا بِأَمْوَالِهِمْ وَأَنْفُسِهِمْ فِي سَبِيلِ اللّٰهِ  
أُولَٰئِكَ هُمُ الصّٰدِقُونَ

*"Sesungguhnya orang yang sebenar-benarnya beriman hanyalah orang yang percaya kepada Allah dan Rasul-Nya, kemudian mereka (terus percaya dengan) tidak ragu-ragu lagi, serta mereka berjuang dengan harta benda dan jiwa mereka pada jalan Allah; mereka itulah orang yang benar (pengakuan imannya)".*

Walaupun tanggungjawab ini berat, namun umat Islam wajib bertindak bagi memperbetul serta memperjelaskan hakikat penghayatan Islam kepada masyarakat. Kita mesti mempunyai cita-cita murni yang tinggi sesuai dengan ketinggian Islam yang telah dianugerahkan oleh Allah SWT kepada kita.



Sebaliknya, janganlah kita merasa lemah, rendah diri dan tidak yakin dengan kekuatan Islam.

Sekalipun ia memerlukan sejumlah tenaga, fikiran dan wang yang terpaksa dikorbankan untuk mempertahankan kesyumulan Islam, namun ianya adalah perjuangan, jihad dan pengorbanan yang perlu dilaksanakan oleh setiap individu Muslim yang cintakan kebenaran demi mengharap redha Ilahi.

Sesungguhnya kebesaran, kehebatan, ketinggian sesuatu bangsa menurut pandangan Islam ialah apabila ia berpaut dengan Islam. Sejarah telah membuktikan apabila sesuatu bangsa meninggalkan Islam atau apabila pemimpin mereka meninggalkan Islam maka bangsa itu akan ditimpakan kehinaan. Umar Ibn Al-Khattab pernah menyatakan;

"Allah telah memuliakan kita dengan Islam". Sebab itu janganlah kita mencari jalan lain untuk mendapatkan kemuliaan, kerana Allah akan menghinakan kita.

Inilah yang telah menimpa umat Islam masa kini yang lemah, ketinggalan dan tidak dihormati kerana ada di antara umat Islam yang menolak enggan membangun bersama Islam .

Justeru, kita memerlukan jemaah atau kerajaan untuk melaksanakan gerakan yang berterusan bagi menggembleng tugas ini. Kita mesti menyediakan generasi yang sentiasa bersedia menggalas tugas mulia ini. Kita perlu menyedari bahawa tiada siapa yang akan kekal. Kita bukanlah orang yang memulakan perjuangan ini malahan kita meneruskan perjuangan generasi sebelumnya. Manakala tanggungjawab ini akan diteruskan oleh generasi yang mendatang pula. Kita adalah ibarat mata rantai yang akan memastikan supaya rantaian perjuangan membela dan mempertahankan Islam akan sentiasa bergerak dengan lancar dan berterusan sekalipun ianya akan diganggu disepanjang perjalanan.



## Sidang Jumaat Yang di Rahmati Allah,

Bagi memastikan Islam dapat dilaksanakan dengan mantap, padu dan istiqamah, kita perlu membuat persiapan rohani atau jiwa dan persiapan organisasi, diri dan keluarga. Kita perlu merancang dan melaksanakan aktiviti yang berterusan untuk menyuntik ilmu, kefahaman, semangat dan kekuatan bagi menyampaikan ajaran Islam yang benar dan memenuhi kehendak Allah SWT dan Rasul-Nya sehingga hari kiamat. Umat Islam tidak harus lemah dan kecewa apabila menyaksikan kekalahan. Namun kekalahan akan menjadi penggerak kepada perjuangan. As-shahid Syed Qutb pernah menyatakan;

*"Dalam perjuangan itu ada masa meningkat dan ada masa menurun. Kekalahan itu sebenarnya bermula daripada kita merasa lemah dan kemenangan itu bermula apabila kita merasa tidak kalah."*

Marilah kita menjadi Muslim yang merasa yakin dan tinggi dengan 'izzah Islam. Seterusnya merasa hebat dan yakin dengan kebebasan yang diberikan oleh Islam dan sentiasa bersedia untuk menyeru kepada kebenaran Ilahi. Bersedia untuk membebaskan diri daripada segala bentuk belenggu penguasaan atau penjajahan pemikiran. Sentiasa istiqamah dengan tindakan ke arah mengembalikan peranan Islam sebagai syariat yang unggul dan memberikan kebaikan, kerahmatan serta keselamatan kepada seluruh makhluk Allah di dunia ini.

أَعُوذُ بِاللَّهِ مِنَ الشَّيْطَانِ الرَّجِيمِ



قُلْ إِنَّ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ  
الْعَالَمِينَ ﴿١٦٢﴾ لَا شَرِيكَ لَهُ ۚ وَبِذَلِكَ أُمِرْتُ وَأَنَا أَوَّلُ  
الْمُسْلِمِينَ ﴿١٦٣﴾

"Katakanlah (wahai Muhammad): "Sesungguhnya solatku dan ibadahku, hidupku dan matiku hanyalah untuk Allah, Tuhan yang memelihara dan mentadbirkan sekalian alam. Tiada sekutu bagi-Nya, dan itulah yang diperintahkan kepadaku, dan aku adalah orang yang terawal menyerahkan diri (kepada Allah)."

(Al-An'am :162-163)

بَارَكَ اللَّهُ لِيْ وَلَكُمْ بِالْقُرْآنِ الْعَظِيمِ، وَنَفَعَنِي  
وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ،  
وَتَقَبَّلَ مِنِّيْ وَمِنْكُمْ تِلَاوَتَهُ، إِنَّهُ هُوَ السَّمِيعُ  
الْعَلِيمُ.



أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ  
وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ  
وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.





## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ، لَا شَرِيكَ لَهُ،  
وَأَشْهَدُ أَنَّ مُحَمَّدًا عَبْدُهُ، وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى  
آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ فَقَدْ فَازَ الْمُتَّقُونَ.  
قَالَ اللَّهُ تَعَالَى: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ  
يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ وَسَلِّمْ عَلَى سَيِّدِ الْمُرْسَلِينَ وَارْضَ اللَّهُمَّ عَنْ  
أَصْحَابِهِ وَقَرَابَتِهِ وَأَزْوَاجِهِ وَذُرِّيَّاتِهِ أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ



الْأَحْيَاءَ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ مُجِيبُ  
الدَّعَوَاتِ يَا قَاضِيَ الْحَاجَاتِ. اَللّٰهُمَّ اِنَّا نَسْأَلُكَ وَنَتَوَسَّلُ  
إِلَيْكَ بِنَبِيِّكَ الْأَمِينِ، وَنَسْأَلُكَ بِأَسْمَائِكَ الْحُسْنَى وَصِفَاتِكَ  
الْعُظْمَى أَنْ تَحْفَظَ بَعَيْنَ عِنَايَتِكَ الرَّبَّانِيَّةَ وَبِحِفْظِ وَقَايَتِكَ  
الصِّمْدَانِيَّةَ، جَلَالَةَ مَلِكِنَا الْمُعْظَمِ سُلْطَانَ سَلَاعُورَ، سُلْطَانَ  
شَرَفُ الدِّينِ اَدْرِيسِ شَاهِ الْحَاجِ ابْنِ الْمَرْحُومِ سُلْطَانَ  
صَلَاحُ الدِّينِ عَبْدِ الْعَزِيزِ شَاهِ الْحَاجِ.

اَللّٰهُمَّ اَدِمِ الْعَوْنَ وَالْهُدَايَةَ وَالتَّوْفِيقَ، وَالصِّحَّةَ وَالسَّلَامَةَ  
مِنْكَ، لَوْلِيَّ عَهْدِ سَلَاعُورَ، تَعَكَوْ أَمِيرِ شَاهِ ابْنِ السُّلْطَانَ  
شَرَفُ الدِّينِ اَدْرِيسِ شَاهِ الْحَاجِ فِي أَمْنٍ وَصَلَاحٍ وَعَافِيَةٍ  
بِمَنَّكَ وَكَرَمِكَ يَا ذَا الْجَلَالِ وَالْإِكْرَامِ. اَللّٰهُمَّ أَطِلْ  
عُمَرَهُمَا مُصْلِحَيْنِ لِلْمُوظَّفَيْنِ وَالرَّعِيَّةِ وَالْبِلَادِ، وَبَلِّغْ  
مَقَاصِدَهُمَا لِطَرِيقِ الْهُدَى وَالرَّشَادِ.



Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam khususnya negeri Selangor, sebagai negeri yang maju, sejahtera dan berkebakikan.

Justeru kami pohon kehadiran-Mu ya Allah, tetapkanlah iman kami, tingkatkanlah amal kami, kukuhkanlah perpaduan kami, murahkanlah rezeki kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, kembalikanlah kami ke jalan yang Engkau redhai, lindungilah kami daripada ujian-Mu yang berat seperti kemarau panjang, banjir besar, wabak penyakit, persengketaan, kemiskinan dan lain-lain, supaya dengan demikian, negeri kami akan sentiasa bertambah makmur dan berkat.

Engkau bukanlah hati umat Islam, khususnya di Negeri Selangor untuk melaksanakan ibadah zakat sebagaimana yang telah Engkau fardhukan di dalam Al-Quran. Berkatilah hidup orang-orang yang melaksanakan tuntutan berzakat, menyayangi fakir dan miskin, sucikanlah harta dan jiwa mereka agar mereka hidup dalam keredhaan-Mu. Kau lindungilah golongan fuqara' dan masakin daripada kekufuran dan kefakiran yang berpanjangan.

رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ وَاجْعَلْنَا  
لِلْمُتَّقِينَ إِمَامًا. رَبَّنَا آتِنَا فِي الدُّنْيَا حَسَنَةً وَفِي الْآخِرَةِ  
حَسَنَةً وَقِنَا عَذَابَ النَّارِ.



عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي  
الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ  
يَعْظُمُ لِعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ نِعَمِهِ  
يَزِدْكُمْ، وَاسْأَلُوهُ مِنْ فَضْلِهِ يُعْطِيكُمْ وَلَذِكْرُ اللَّهِ أَكْبَرُ  
وَاللَّهُ يَعْلَمُ مَا تَصْنَعُونَ.

YUSOP /Li \*\*